

Akiitsunut aningaasaliinissamullu pilersaarutit naapertorlugit Tasiilami mittarfiliornissamut periarfissaqarsinnaaneranut atatillugu misissueqqaarnerit tullianillu businesscare aallarteqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut. Misissueqqaarnerit naammassineqareersimassapput ukiumi aningaasaliiffiusumi 2015-mi timmisartunut suluusalinnut mittarfiliornerup pilersaarusionera aallartinneqarsinnaaqqullugu
(Inatsisartunut ilaasortamit Andreas Uldumimit, Demokraatit, saqqummiunneqartoq)

pillugu

Aningaasaqarnermut Akileraartarnermullu Ataatsimiititaliap

ISUMALIUTISSIISSUTAA

Siunnersuutip aappassaaneernejarnissaanut saqqummiunneqartoq

Ataatsimiititaliaq suliarinninnermini ukuninnga inuttaqarpoq:

Inatsisartunut ilaasortaq Finn Karlsen, Siumut, siulittaasoq
Inatsisartunut ilaasortaq Gerhardt Petersen, Atassut, siulittaasup tullia
Inatsisartunut ilaasortaq Evelyn Frederiksen, Siumut
Inatsisartunut ilaasortaq Jens Imanuelsen, Siumut
Inatsisartunut ilaasortaq Kalistat Lund, Inuit Ataqtigiit
Inatsisartunut ilaasortaq Hans Aronsen, Inuit Ataqtigiit
Inatsisartunut ilaasortaq Naaja Nathanielsen, Inuit Ataqtigiit

Ulloq 3. oktober 2013-imi siullermeerinerup kingorna siunnersuut ataatsimiititaliamit misissorneqarpoq.

Siunnersuutip imarisaa siunertaalu

Akiitsunut aningaasaliinernullu periusissaq naapertorlugu Tasiilami mittarfiliorsinnaaneranut atatillugu misissueqqaarnerit tamatumalu kingorna suliaasatut pilersaarutip allaaserineqarnera aallarteqqullugit Naalakkersuisut peqquneqarnissaat siunnersuuteqarnermi siunertaavoq. Misissueqqaarnerit naammassineqareersimassapput ukiumi aningaasaliiffiusumi 2015-imi mittarfiliornerup pilersaarusionera aallartinneqarsinnaaqqullugu.

Siunnersuutip Inatsisartunit siullermeerneqarnera

Siunnersuut paasisinnaalluaritsik **Naalakkersuisut** oqaatigaat, itigartinneqarnissaali inassutigalugu, tassa nuna tamakkerlugu immikkoortunut pilersaarutip naammassineqarnissaa utaq-qeqqaarumaneqarmat, tamatumalu kingorna akissuteqaat naapertorlugu Naalakkersuisut siunertaraat Tasiilami mittarfissamut misissueqqaarnissat aamma suliasatut pilersaarutaasup allaaserineqarnera aallartinneqassasut. Immikkoortunut pilersaarut 2014-imi ukiup affaani siullermi naammassineqassasoq naatsorsuutigineqarpoq.

Siunnersuut **Siumumit** taperserneqanngilaq, tassa misissuinermi suliaqarnissaq Naalakkersuisunit oqaatigineqartoq 2014-imilu ukiup affaata siulliup ingerlanerani saqqummiunneqartussatut naatsorsuutigineqartoq utaqqimaarusunneqarmat.

Ilaatigut ilaasunik angallassinermik aaqqissuussinerup ilaasut pisariaqartitaviinut naleqqusarneqartariaqarnera aallaavigalugu **Inuit Ataqtigiit** siunnersuut taperserpaat.

Siunnersuut **Atassumit** taperserneqarpoq, tamatumani tunngavissaatinneqarpoq misissueqqaarnerit suliasatullu pilersaarutaasup allaaserineqarnerata inerneril ilisimaneqalersinagit mittarfiliorsinnaanerup aallartinneqarnissaanut ulluliisoqartariaqanngitsoq.

Siunnersuut **Demokraatinit** taperserneqarpoq.

Ataatsimiititaliap siunnersuummik suliarinninnera

Sipaartussatut naatsorsuutigineqartut siunnersuuteqartup taasai Assartuinermit Isumalioqatigiissitap isumaliutissiissutaani immikkoortoq 9.3-mi allassimmammata ataatsimiititaliamit oqaatigineqassaaq, isumalioqatigiillu tunngavissaatitaasa il.il. sukumiinerusumik tassani nasuiarneqarnerat ataatsimiititaliamit innersuussutigineqarpoq. Mittarfik Kulusummit Tasiilamut nuunneqassappat tunngavissaatitaasut aallaavigalugit inuiaqatigiinnut akilersinnaanerata naatsorsuutigineqarsinnaanerani siunnersuuteqartup oqarnera ilumoormat ataatsimiititaliamit oqaatigineqassaaq.

Ataatsimiititaliaq isumaqarpoq siunnersuutip saqqummiunneqartup oqaasertalersorneqarnera Naalakkersuisut pingaarnersuinissaq pillugu pilersaarutitut nassuiaatigisaannut toqqaannartumik akerliunngitsoq, tassa ataatsimiititaliap paasinninnera malillugu pissutsit aalajangersimasut Tasiilami mittarfiliorsinnaanermi pingaaruteqartut qulaajarneqarnissaat siunertaralugu misissuinerneq pisariaqartunik Naalakkersuisut aallartitsinissamik peqquneqarnissaat siunnersuummi kisimi pineqarpoq. Naalakkersuisut oqariartuutaat ersarisoq imaappoq:

”Taamaammat nuna tamakkerlugu mittarfeqarnermut immikkoortunut pilersaarut piareeripat Tasiilami mittarfissamut misissueqqaarnissat aamma suliasatut pilersaarutaasup allaatigineqarnera (businesscase) aallartinneqassasut Naalakkersuisut siunertaraat.”

Ataatsimiititaliap inassuteqaataa

Ataatsimiititaliami amerlanerussuteqartut Siumut Atassullu siunnersuut pillugu ima oqaaseqaateqarumapput:

Naalakkersuisut akissuteqaataat ataatsimiititaliami amerlanerussuteqartunit tunngavigineqarpoq.

Ataatsimiititaliami ikinnerussuteqartut Inuit Ataqtigiit siunnersuut pillugu ima oqaaseqaateqarumapput:

Isumaqtigiinngissutituaasoq tassaavoq misissueqqaarnerit suliassatut pilersaarutaasup allaaserineqarnissaata piffissaq aallartiffissaat, taamaalillunilu aamma pilersaarusiornep aallartinnissaa.

Tamanna tunngavigalugu ataatsimiititaliami ikinnerussuteqartut siuliani taaneqartut allannguutissatut siunnersuummik imaattumik saqqummiussipput:

Akiitsunut aningaasaliinernullu periusissaq naapertorlugu Tasiilami mittarfiliorsinnaanermut atatillugu misissueqqaarnerit tamatumalu kingorna suliassatut pilersaarutip allaaserineqarnera aallarteqqullugit Naalakkersuisut peqquneqarnissaannik Inatsisartut aalajangiiffisassaattut siunnersuut. Tasiilami mittarfiliornissamut misissueqqaarnerit suliassatullu pilersaarutip allaaserinera immikkoortunut pilersaarut 2014-imi ukiup affaani siullermi piareerpat aallartinneqassapput.

Taama oqaaseqarluni isumaliutissiisummilu allassimasutut paasinnilluni ataatsimiititaliap siunnersuut aappassaaniigassanngortippaa.

Finn Karlsen, siulittaasoq

Gerhardt Petersen

Evelyn Frederiksen

Jens Immanuelson

Naaja Nathanielsen

Hans Aronsen

Kalistat Lund